



PREDSTAVNIČKI / ZASTUPNIČKI DOM

ПРЕДСТАВНИЧКИ ДОМ

Sarajevo, 21.7.2023. godine

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO:	24-07-2023		
Organizaciona jedinica	Klasifikaciona oznaka	Redni broj	Broj priloga
01-02-2	1619/22		

PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM

**Predmet:** Prijedlog Rezolucije, dostavlja se

Na osnovu člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22) podnosimo „Prijedlog Rezolucije o zaštiti ustavnog poretka Bosne i Hercegovine sa pozivom na odlučno djelovanje“, sa zahtjevom da se u skladu sa članom 70. stav (3) Poslovnika, Prijedlog rezolucije uvrsti u dnevni red 9. sjednice Predstavničkog doma Parlamentarne skupštine Bosne i Hercegovine zakazane za 24.7.2023.

U prilogu dostavljamo tekst Prijedloga rezolucije.

**Poslanici/zastupnici:**

Šerif Špago

Edin Ramić

Šemsudin Dedić

Milan Dunović

Jasmin Emrić

Safet Kešo

Amor Mašović

Šemsudin Mehmedović

Zlatan Begić

Elvisa Hodžić

Midhat Čaušević

Nermin Mandra

Denjal Tulumović

Vlatko Glavaš

## PRIJEDLOG

**Privrženi** principu vladavine prava, poštivanju Ustava Bosne i Hercegovine i Općeg okvirnog sporazuma za mir u Bosni i Hercegovini (u daljnjem tekstu: Dejtonski mirovni sporazum), kao i razvoju demokratskih institucija;

**Svjesni** opasnosti od aktuelnih destruktivnih političkih procesa i separatističkih djelovanja kojima se krši Dejtonski mirovni sporazum, podriva ustavni i pravni poredak, te ugrožava mir u Bosni i Hercegovini, destabilizira region i narušava sigurnost u širem međunarodnom kontekstu;

**Snažno** opredijeljeni za euroatlantsku budućnost Bosne i Hercegovine i njenu izgradnju kao moderne, demokratske, pravne i sigurne države koja osigurava ljudska prava i osnovne slobode, te štiti interese i ravnopravnost svih naroda i građana;

**Zabrinuti** zbog nastavka i intenziviranja napada na Ustavni sud i druge institucije Bosne i Hercegovine;

**Podsjećajući** na odgovarajuće rezolucije Vijeća sigurnosti Ujedinjenih nacija i Aneks 10. Dejtonskog mirovnog sporazuma u kojem je određena uloga Visokog predstavnika kao konačnog organa za tumačenje Sporazuma o civilnoj implementaciji Mirovnog ugovora sa ovlaštenjima za donošenje obavezujućih odluka kada ocjeni da je to neophodno, definisanu obavezu svih u Bosni i Hercegovini da surađuju sa svim institucijama uključenim u provođenje Dejtonskog mirovnog sporazuma, uključujući i Aneks 4. Ustav Bosne i Hercegovine;

**Podsjećajući** da član VI.5. Ustava Bosne i Hercegovine definiše da su odluke Ustavnog suda Bosne i Hercegovine konačne i obavezujuće;

**Imajući u vidu** da nepoštivanje odluka Ustavnog suda Bosne i Hercegovine i Visokog predstavnika u Bosni i Hercegovini predstavljaju napad na ustavni i pravni poredak Bosne i Hercegovine, te da su to krivična djela u skladu s Krivičnim zakonom Bosne i Hercegovine;

Na osnovu člana IV.4.e) Ustava Bosne i Hercegovine i člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 26/20, 53/22), Predstavnički dom Parlamentarne skupštine Bosne i Hercegovine, na 9. sjednici održanoj 24. 7. 2023. godine, usvojio je

## REZOLUCIJU

### O ZAŠTITI USTAVNOG PORETKA BOSNE I HERCEGOVINE SA POZIVOM NA ODLUČNO DJELOVANJE

1. Predstavnički dom Parlamentarne skupštine Bosne i Hercegovine traži od Vijeća za implementaciju mira, Ureda visokog predstavnika i država svjedoka da ispune obaveze proizašle iz Dejtonskog mirovnog sporazuma, te odlučno reaguju i zaustave napad na ustavni poredak Bosne i Hercegovine izvršen od strane organa vlasti entiteta Republika Srpska činom donošenja i objave u Službenom glasniku Republike Srpske Zakona o neprimjenjivanju odluka Ustavnog suda Bosne i Hercegovine i Zakona o izmjeni Zakona o objavljivanju zakona i drugih propisa Republike Srpske.

2. Predstavnički dom Parlamentarne skupštine Bosne i Hercegovine pozdravlja izvršavanje obaveza pravne naravi od strane visokog predstavnika Christiana Schmidta u vezi sa stavljanjem van snage zakona kojima je Narodna skupština Republike Srpske proglasila nevažećim odluke Ustavnog suda Bosne i Hercegovine na teritoriji ovog entiteta i ukinula obavezu objavljivanja odluka Visokog predstavnika u Službenom glasniku Republike Srpske.

Predstavnički dom Parlamentarne skupštine Bosne i Hercegovine pozdravlja i smatra opravdanom Odluku Visokog predstavnika za Bosnu i Hercegovinu kojom se donosi Zakon o izmjenama i dopunama Krivičnog zakona Bosne i Hercegovine gdje se kriminalizira neprovođenje i nepoštivanje konačnih i obavezujućih odluka Ustavnog suda Bosne i Hercegovine i odluka Visokog predstavnika za Bosnu i Hercegovinu.

S tim u vezi, Predstavnički dom Parlamentarne skupštine Bosne i Hercegovine poziva sve nadležne organe i institucije Bosne i Hercegovine na hitno postupanje radi procesuiranja i sankcionisanja službenih i odgovornih osoba u organima vlasti entiteta Republika Srpska zbog napada na Ustavni sud Bosne i Hercegovine, pokušaj promjene ustavnog poretka Bosne i Hercegovine i nepostupanja po odlukama Visokog predstavnika u Bosni i Hercegovini što predstavlja ozbiljno kršenje Dejtonskog mirovnog sporazuma, a samim tim i narušavanje mira i stabilnosti u zemlji i regiji.

3. Predstavnički dom Parlamentarne skupštine Bosne i Hercegovine poziva Tužilaštvo Bosne i Hercegovine da u skladu sa zakonskim nadležnostima hitno preduzme odgovarajuće mjere protiv svih osoba odgovornih za napad na ustavni poredak Bosne i Hercegovine.

4. Predstavnički dom Parlamentarne skupštine Bosne i Hercegovine podsjeća sve izabrane i imenovane osobe na svim nivoima vlasti u Bosni i Hercegovini, a posebno predstavnike vlasti entiteta Republika Srpska, da je Parlamentarna skupština Bosne i Hercegovine jedina institucija koja može u propisanoj proceduri mijenjati Ustav Bosne i Hercegovine.

5. Pozivamo niže nivoe vlasti u Bosni i Hercegovini da se pridržavaju ustavnih i zakonskih nadležnosti pri donošenju propisa, te da se posebno posvete provođenju neophodnih socioekonomskih reformi koje imaju za cilj poboljšanja standarda građana i ispunjavanje prioriteta na euroatlanskom putu Bosne i Hercegovine.

Broj: \_\_\_\_\_

Sarajevo, \_\_\_\_\_

Predsjedavajući  
Predstavničkog doma  
Parlamentarne skupštine BiH